

PREDGOVOR

S obzirom na to da se naša zemlja svrstava u tranzicijske zemlje, osnovno pitanje ukupnih reformi je uspostava ekonomije na tržišnim temeljima.

To je, između ostalog, podrazumijevalo i veoma važnu reformu bankarskog i finansijskog sistema, kao i temeljitu reformu platnog sistema Bosne i Hercegovine (BiH) i njihovo prilagođavanje međunarodnim standardima koji vrijede u najrazvijenijim zemljama tržišne orijentacije.

Zbog posebne važnosti, metaforički opisano može se reći da platni sistem predstavlja "finansijski krvotok" privrednog sistema jedne zemlje.

Transformacija platnog prometa u BiH značila je ukidanje monopol-skog državnog sistema unutrašnjeg platnog prometa i prenos tih poslova na komercijalne banke kao nosioce platnog prometa.

Reformom je izgrađen moderan i efikasan platni sistem sa operativnim početkom rada od 5. januara 2001. godine, koji zadovoljava savremene standarde, uz obuhvat pravila, procedura i regulative u ovoj oblasti.

Moderni platni sistem je veoma značajan za normalno funkcionisanje ekonomije zemlje, implementaciju monetarne politike i održavanja finansijske stabilnosti.

Donošenje Zakona o platnim transakcijama bio je važan čin i preduvjet za funkcionisanje reformisanog platnog prometa u BiH.

Donošenjem ovog zakona osigurane su dobre osnove za novi oblik obavljanja platnih transakcija.

U Priručniku je dat detaljan prikaz načina funkcionisanja oba platna sistema za izvršenje međubankarskih platnih transakcija kojima upravlja Centralna banka BiH (CBBiH), počev od iniciranja platne transakcije kao credit-transfera (transfera odobrenja, kojeg započinje dužnik koji ima obavezu plaćanja) ili kao debit-transfera (transfera zaduženja, kojeg započinje povjerilac davanjem instrukcije banci), sve do konačnog poravnania svih naloga za plaćanje koji su u toku jednog radnog dana primljeni u CBBiH.